

## **KONTROL MOZIOA**

### **MARTXOKO UDALBATZARREAN PENTSIODUNEN INGURUAN HARTUTAKO KONPROMISOAK DIRELA ETA, PENTSIODUNEN KOLEKTIBOAK EGINDAKO ESKAERAREN INGURUAN**

Olaia Duarte Lopezek, EH BILDU udal taldeko zinegotziak, Udaltzaren Organo Araudiaren 98. artikulua oinarri, mozio hau aurkezten du Udaltzaren azter dadin. Mozioa 2018ko abenduaren 10ean Pertsonen Batzordean aztertutako interpelazioaren ondorioa da.

## **JUSTIFIKAZIOA**

Donostiako Udalak 2017an emandako Gizarte Larrialdietarako Laguntzen inguruko datuek argi adierazten dute, urtetik urtera, gora egiten dutela laguntza hauek behar dituzten 65 urtetik gorako pentsiodunek. Datu orokorrak ikusita, 2015etik 2017ra GLLen eskaerak behera egin dute % 6,28. Baina, pertsona pentsiodunek egindako eskaerak ikusita, urtetik urtera diru laguntzak behar dituzten pentsiodun donostiarrak gero eta gehiago direla ikus dezakegu. Batez ere, 65 urtetik gorako emakumezkoak dira diru laguntza hauek beharrezkoak dituztenak, oinarrizko gastuei aurre egin ahal izateko, eta haien kopurua gora doa.

Pentsiodun horietatik % 80 emakumezkoak dira. Pobreziaren feminizazioaren eredu hau Diru Sarrerak Bermatzeko Errentaren kasuan ere errepikatu egiten da. Azkeneko datuek diote DSBEn onuradunen % 25 (15.500 pertsona) pentsiodun pobreak direla; hau da, hileroko 787 euro baino gutxiagoko pentsioa jasotzen duten pertsonak. Kasu honetan ere emakumezkoen egoera da kezkarriena; izan ere, DSBE jasotzen duten hiru pentsiodunetatik bi emakumezkoak dira.

Datu kezkarri hauen aurrean, pentsiodun asko ikusi dugu udaletxe aurrean zein kaleetan pentsio duinen aldarrikapena egiten urte hasieratik. Kezka hau ikusita, Udaltzaren gure taldeak proposatutako honako mozio hau onartu zuen aho-batez aurtengo martxoan:

*1.- Udaltzaren hertsatuki eskatzen dio Udaltzari epe motzean komunikazio kanpaina zehatz bat egin dezala diru-sarrerara urriak dituzten pertsona pentsionistek eska ditzaketan diru-laguntzen berri izan dezaten.*

*2.- Udaltzaren hertsatuki eskatzen dio Udaltzari hiriko jubilatuen etxeekin eta hirugarren adineko eragile zein elkarteekin saio bat egin dezala, udal gizarte zerbitzuetan eska daitezkeen diru laguntza ekonomiko berri emateko eta pentsionisten iritzi eta kezka jasotzeko.*

3.- *Udalbatzak hertsatuki eskatzen dio Udal Gobernuari azterketa bat egin dezala hiriko emakume pentsionisten pobrezia-aren inguruko diagnostiko bat edukitzeko.*

Bost hilabete pasatu ondoren, ez genuen mozioan jasotako neurrien berri eta pentsionidunen plataformak zioenaren arabera, ez zen inongo bilerarik egin diru laguntza ekonomikoen berri emateko. Gauzak horrela, gaia batzordeetara eraman genuen irailean eta alkateak adierazi zuen pentsiodunen plataformak egindako eskaerei erantzuna emateko denbora behar zela eta horregatik ez zitzaizela erantzunik eman.

Alkateak ez zigun martxoko plenoan onartutako neurrien inguruan azalpenik eman (diagnostikoa edo komunikazio kanpainaren inguruan) eta berriro ere honako kontrol mozio hau aurkeztu genuen iraileko udalbatzarrean:

1.- *Udalbatzak hertsatuki eskatzen dio Udal Gobernuari martxoko udalbatzarrean onartutako neurriak (justifikazioan aipatzen direnak) hiru hilabeteko epean bete ditzala eta horren guztiaren berri eman diezaiola Alderdi Ederreko pentsionisten plataformari.*

Kasu honetan ere, gure proposamena aho-batez onartu zen. Urtea amaitzen ari den honetan, Alderdi Ederreko Pentsionisten Plataformak idatzi bat aurkeztu du Udalean (zka.199/35918) bere egonezina adieraziz. Ez dute ulertzen zergatik ez diren martxoko plenoan onartutako neurriak bete eta, bederatzi hilabete hauetan, ez dute berririk izan.

Abenduko batzordean, Gizarte-ekintzako delegatua interpelatu dugu eta haren erantzuna izan da mozioan jasotzen zen komunikazio kanpaina ez dela martxan jarriko ez delako laguntzen inguruko espektatiba faltsurik sortu nahi. Zaila egiten zaigu argumentu hau ulertzea; izan ere, hainbat udal sailetan eskaintzen diren diru laguntzekin komunikazio kanpainak egiten dira eta gero, herritarrak Udalera gerturatzerakoan argitzen dira baldintza eta aukera zehatzak.

Aldi berean, delegatuak adierazi digu ez dela bilerarik egingo jubilatuen elkarteetan diru-laguntza sistemaren inguruan eta informazioa, erorikoen prebentzioaren tailerrekin batera emango dela. Uste dugu, erorikoen tailerrek ez dutela pentsiodunen multzo zabal bat erakartzen eta horrek informazioaren hedapena mugatzen du.

Bestetik, hiriko emakume pentsiodunen diagnostikoaren inguruko informaziorik ez du aipatu eta 2019ko Udal Gobernuaren aurrekontu proposamenean ez dago jasota ikerketa hori egiteko aurrekonturik.

Azaldutako egoera kontuan hartuta, behean sinatzen duen zinegotziak honako MOZIO hau aurkezten du:

### **KONTROL MOZIOA:**

1.- *Udalbatzak hertsatuki eskatzen dio Udal Gobernuari martxoko eta iraileko udalbatzarretan onartutako neurriak betetzeko baliabideak jar ditzala, Alderdi Ederreko Pentsionisten Plataformak egindako eskaerarekin bat eginez.*

2.- Udalbatzak hertsatuki eskatzen dio Udal Gobernuari hiriko emakume pentsiodunen pobreziaren inguruko diagnostikoa egiteko baliabideak jar ditzala.

Donostian, 2018ko abenduaren 14an

Olaia Duarte López

EH Bildu udal taldeko zinegotzia